

Juañja kasak ne kalta gaune

Zuñgajienapanaldiamak

Meja ai kalta gauwane: Duwe Jesúja 12 shaxaldix-akuega aldéñ izhgajañguxa Juañja jalde kalta gauwane. Ega na Duwe Jesúja ají múldigaba guaxaldixa gaxanekue nañga agatsé.

Mekuetshi kalta gauwane: Juañja aldéñ tunamak ne guashi Duwe Jesús ipananekekue jalde kalta kagakauwane. Aldéñki Asia baxe nahauxa Duwe ipananekekue aksaneshi izhone. Ai zhinik na eñgui baxe zaldakuetshi kalta gauwane ajañguxa (2.12-14).

Jinak ai kalta gauwane: Juañja naldi jinak jalde kalta gauwane ekí guaklde: “Maiñ ‘Duwe Jesúki Jatetshi Asukuága nazikuanamak nakldá’ jañgui ipanaminekuañ na jalde kalta ekí miñgakauwatokuge. Ekíki abisa-jañ izhoshiña izhogapanamine muldetua miñkualdiña mizhekualdaldiamak” (5.13). Ekí izhogakualdiamake Duwe Jesús shaldaki namaklde jañguakue, jian atshakua-mak za atshiji, aldéñ zuñmenamak ataba atabañ ajañgual nogakue.

Ji, ji shalda guashi jalde kalta gaune:

1. Duwe Jesúki Saldiña netshi Jatetshi Múldigaba (1.1-4)
2. Duwe Jesús na, Jate na muldetua ishkaldaldi izhogakue (1.5-2.28)
3. Duwe Jesútshi nekaldekuañki Jatetshi sukua kaldé (2.28-4.6)
4. Duwe ipanane mitsabé izhogakue (4.7-5.21)

Juañja kasak ne kalta gaune

Duwe Jesúki Saldiña netshi Jatetshi Múldigaba

¹ Jalde miñkuzgauwatokugeki Saldiña netshi Jatetshi Múldigaba naldiña ne xalte. Eñki Duwe Jesúga, ega na Jateja guaká zuñwashekuiña aldunaxa abisajañ zunezhokshixa nakldá. Aldéñki kasakga ni ji jiaga naldagá nogueña jiaga izhoshiña izhuka nalgué, ixagabaldegueni nasuñki nauwiji ubak naldi tuñkaldane, sakí guagaté nukañkaldanega. Ekí tuañkaldogatsak nauwiji káuxaldak naldi akpanañkaldanega nakldá. ² Akze, aldéñki aldunaxa mezhokshakuega Ajate naña izhogue, Jatejaña tuakualdiamake zuñgixagabakuá. Ai zhinik na e naldi tuñkaldamak gakuaka. Ega na aldunaxa abisajañ izhoshiña mezhokshakue ni miñmeyañkaldók. ³ Jinak ai tuñkaldamak, nukañkaldamak miñmeyakí. Maiñ nauwijanameña Nauwijate, Asukuá Duwe Jesú na muldetua mishkaldaldiamak. Ai zhinik na, nasuñ na jiaga muldetua ishkaldaldi mizhekualdaldixa. ⁴ Akze, maiñ naña zuñgatsahauxaga zeñ zuñnexaldiamak na ekí kalta miñgakauwatokuge nzha. ⁵

Jateki muñshí zalda ne

⁵ Jalde shi miñkaldiyañkaldukaki Duwe Jesúja naldi shi zuñkaldiyananega nakldá. Aiki Saldiña netshi Jateki muñshí zalda nahamakga na janshizhe za izhoshi, ni ekga nauwa nuxaki tuañ zalda axaldaldazhé nakldá. ⁶ Akna mieldeki “Jate na muldetua ishkaldalkuge nakldá” negatsak aldunaxa tuañ itsekldega sha atshál izhoxaldiake, eñki naldagálde nuxa zukuashi na, ni nauwa Jateja namaklde zunanatuñshanamak atshakí noshiña ekí neka naldaldixa. ⁷ Ekí ne, Jateki muñshí zalda nahamakga nasuñ

☆ 1:1 1.1 Jñ 1.1-4,14; 20.30 ☆ 1:2 1.2 Jñ 11.25; 14.6 ☆ 1:3 1.3 Jñ 15.1-5; 17.22-23 ☆ 1:4 1.4 Jñ 15.11 ☆ 1:5 1.5 Sal 27.1; Jñ 1.4-5,9; 8.12 ☆ 1:6 1.6 2Kt 6.14; 1Jñ 2.11

jiaga jian negaba atshiji, aldunaxa muñshí ẓunzeklde e na muldetua ishkaldaldi izhogakualdiakna, Asukuá Duwe Jesú ipanáñkaldegaba jiaga muldetua ishkaldaldi kizhuka naldakualdixa. Ekí kizhogatshakna, Duweki nauwitsaldí shuigatshak abi akzuldi sha katshixa nuk ẓunesabinéñ zhinik na aldunaxa ẓunejizhalga noxaldixa.✠

8 Ekí ne, mieldeki “nasga sha atshazhúge nakldakú” nexaldiák ẓunake, axaldáñga naldagálde nuxa namak zhikldekshaldixa. Akze, eñki namaklde akualdagálde nuxa ekí nexaldixa nakldá.✠ 9 Ekí ne, mieldeke “Jate, naski sha atshanuge ni atuñkú” akbeyakualdiák ẓunake, aldéñki atshakuamak za atshixa, sakí ẓuñkatshaldixa ẓuñmeyaldinik✠ amak za ẓuñkatshixa nahamakga na, sha atsháñkalde ẓuñkabeti, nuk kutám ne katshauxa aldunaxa ẓunejizhaldixa.✠ 10 Ekí ne, mieldeki “naski ni mitsák sha atshazhá guanuge nakldá” nexaldiák, Jate niñkauwañki naldagálde zukuaká janañga axazgualdixa. Akze, Jatejañki káguba zhekuauxa sha atshixagaba guaka ne jiaga, mieldeki ekí negatshake ají múldigaba ni nauwa agipanaganálde naldi ekí nexaldixa nakldá.✠

2

1 Shui sukuakuañ, sha atshabináldiamak na jalde kalta miñgakauwatokú. Naldatshak mieldeke sha atshañga guakualdiake, ezua ẓuñzukuakaki Saldíñga netshi Jate nugeñka ẓuñgiteñga. Eñki Duwe Jesú Ẓunekualkaga, aldéñki sha atshagálde, jian za izhuka.✠ 2 Akze, sha katshixa shalda guiyaba tuakue ẓuñgatsé nalgué, aldéñki ẓunesabiyaldiamak nauwitsaldí shuixal axaldáñ aké guane. Ekíki Jate sha katshixa ẓuñkabetaldiamak.

✠ 1:7 1.7 1Kt 6.11; Ep 1.7 ✠ 1:8 1.8 Ec 7.20 ✠ 1:9 1.9 Jer 31.34; Mi 7.18-20 ✠ 1:9 1.9 Sal 32.5; 51.2; Pr 28.13 ✠ 1:10 1.10 Is 53.6; 64.6; Jer 17.9 ✠ 2:1 2.1 Alm 8.34

Guatshak nauwitsaldí za ekí atshazháne, káguba zhekuauxa tsaldi ekí atshá guane nakldá.✠

Jateja guagamak atshakue

³ Akze, Saldiñga netshi Jateja atshakue guagamak za axatshál nogakualdiák, ai zhinik na aldéñki “me ne” zũñwashék guane zũñkualdi izhogakualdixa. ⁴ Azhi mieldeki amak axatshakí nogatuka ne jiaga “nas zũnake Jate ‘me ne’ nakué nakldá” nexaldiák, eñki naldagálde zukuaka naldi na, namaklde ni nauwa akualdagáldega ekí nexaldixa nakldá. ⁵ Ekí ne, mieldeke Jateja ají múldigabak guagamak atshañkaldukake, namak giemi aldéñ izhgajañguak guildegakue zũnajañguaneñka zũnakldañkashá guane naldakualdixa. Ekí zhinik na, “Jateldi izhokuge shakldá” zũñwashék guaka.✠ ⁶ Akze, mieldeke “agajuezha naldakí, eldi izhokuge nakldá” negakualdiake, ake, Duwe Jesú jai kagik izhonamakbé izhogakue zũngatsaldashá.✠

⁷ Shuikuañ, aiga na ezua atsha guakue, eñki zhualduxa ajañgual nogakue shalda miñgakauwaldikue. Eñki guiyaba abisa nukabíneki naldazhé. Eñki mauzeñga zalda naldatshak, kasak Duwe Jesú mipanatshak zhinik ai múldigaba nukapanaminamakga nzha.✠ ⁸ Naldatshak jiak, jalde atsha guakue miñgakaukugeki abisaga nakldá. Akze, Duwe jai kagik izhogatoguéñ ai guiyaba amak ibuakuá guanéñ na, nasũñ e ipañañkaldekuañki ekíga atshapánañkalde. Jinake naldakí. Aldunaxa tuañ zũnzeklde izhoxañañkaldogué, Duwe kipanatshake tuañ zalda aguáñ zũñgabapanatshake, aldéñ muñshí zalda nahamakga aldunaxa muñshí zũnezgualdá guane nak.✠

✠ 2:2 2.2 Jñ 11.51-52 ✠ 2:5 2.5 Jñ 14.20-21,23; 15.14; 1Jñ 4.12 ✠ 2:6
2.6 Jñ 13.15 ✠ 2:7 2.7 Lv 19.17-18; Mt 22.36-40; Jñ 13.34-35 ✠ 2:8 2.8
Alm 13.12

⁹ Ekí ne, mieldeki “nas zúnake aldunaxa muñshí netseklde nakldá” negatshak jiaga Duwe ipananekue aguldiyalga noxaldiák, eñki aldunaxa tuañ itsekldega nuxa naldaldixa.✠ ¹⁰ Akze, mieldeke Duwe ipañañkaldekuañgaba ajañgual nogakualdiák zúnake, aldunaxa muñshí zúnzekldega izhogakualdixa. Ekí kizhogatshakna, Jatetshi jiúñguldak zhinik ni ji zúnakbiñguaka naldazháldixa.✠ ¹¹ Ne, mieldeki Duwe ipananekue aguldiyal noxaldiák zúnake, aldunaxa tuañ itseklde izhoshiñga na, uba isaná guane jana “miya ga ni neyatokú” akldegazháldixa nzha.✠

Kagik zalda alduna ikauwasé

¹² Shui sukuakuañ,

Duwe Jesú mimitsaldí shuanéñ zhinik
Jate sha atshamine miñkabetá guane nak
ekí kalta miñkuzgauwatokuge.

¹³ Duwe ipanamine jatekue jana minekuañ,

Duwe Jesúki ni ji jiaga naldagá nogueñga zaldak
axabaldeshi naxabinogatshak muldetua “me ne”
miñwashék guane nak
ekí kalta miñkuzgauwatokuge.

Duwe ipanamine awawakue jana minekuañ,

sha atshátshi sáñkalda jisék agubiyá guamine nak
ekí kalta miñkuzgauwatokuge.

Shui sukuakuañ,

Nauwijate muldetua “me ne” miñwashék guane nak
ni ekí kalta miñkuzgaukú.

¹⁴ Duwe ipanamine jatekue jana minekuañ,

Duwe Jesúki ni ji jiaga naldagá nogueñga zalda nal-
datshak,

✠ 2:9 2.9 1Jñ 4.20 ✠ 2:10 2.10 Jñ 8.12 ✠ 2:11 2.11 Pr 4.18-19; Jñ 12.35

e axabaldeshi naxabinogatshak muldetua “me ne”
miñwashék guane nak
ni ekí kalta miñkuzgaukú.

Duwe ipanamine awawakue jana minekuañ,
Duwek za kama gushi, abá naldakí agapa neyalga
minogatshak,
Jatetshi múldigaba miñjuizha naldakí amak atshál za
noshi,
sha atshátshi sáñkalda jisék agubiyá guamine nak
ni ekí kalta miñkuzgaukú.✠

¹⁵ Ekí minakna maiñki Duwe ipanazhánekue janañga
jika kagik zalda za akzé jañgui alduna ikauwabináldi.
Ni ekue sha ajanashiji ashekuamak izhogakue
itshanabináldi. Akze, mieldeke ekí mizhekualdaldixa
miñnexaldiák, Saldiñga netshi Jateki namak giemi
izhgajañguabíne naldaldixa.✠ ¹⁶ Jinake naldakí.
Saldiñga jai kagik zalda shane mikldexaki Jatek
zhinik nagazhánekue nak. Ejiékue na abuák sha
atshindana mikzekája miksanegamak mikldunká za niji,
jika mikldunakagaba matuñkákí mixaldaldakuegaba
jañgui, jiñgaba zhinik nuxa sekuazhikshiji mikzé
mixajanaldiamak za niji. Ekí izhoxaki jai kagik sha
ajanashéñ zaldagaba nuxa nakldá.✠ ¹⁷ Akze, kagiki
zuxaitaté nogamakga na, saldiñga eñ zalda, shane
mikldexa juizhi zuxaitaté nuxa nakldók. Ekí ne,
mieldekuañki Jate zunañañguamak axatshál kizhukak
zunake e na izhoshiñga kizhogataná nakldá.✠

Duwe akaldak aguldiñkakuek be axaldogakue

¹⁸ Shui sukuakuañ, auxa zexaldiéñ zexaldá na
guapán. Akna ezua sigí Duwe Jesú akaldak aguldiñka

✠ 2:14 2.13-14 Ep 6.10-14,17 ✠ 2:15 2.15 Alm 12.2; Kls 3.1-4; St 4.4

✠ 2:16 2.16 Alm 13.14; Tit 2.12 ✠ 2:17 2.17 2Kt 4.18

“auxa zegatshak naxaldixa niyó” nukaminamakga, kaiga míngaki matshuwi ekíga Duwe aguldiñkakue izhañká na akú. Ai zhinik na auxa zexaldá guxá zũñkualdashá.✠ 19 Ekí Duwe aguldiñkakueki nasũñ nañga izhajuizhaldekakue nane. Naldatshak jiak namake Duwe iyapanazhánekue nalguakna nauwikenáñ zhinik agazaxaitanekue. Akze, nasũñ nañga agatsekue nanaldíñki nasũñ nañga abataldé. Nalgué jinake agazaxaitane naldakí. Aikueki ni ezua nasũñ na agatsekue naldazhé ne awatualdixa nak.✠

20 Naldatshak maiñ Jate miyaxazauwaldiamake Duwe Jesú Jatetshi giemi nejañga Jatetshi Alduna miñgenéñ zhinik na, namaklde miñkualdiñga jiki namaklde, jiki naldagálde miñgabeyatuka miñkualdaka.✠ 21 Akna ekí kalta miñgakauwaldatshake Jate shalda namaklde miñsũñze mimajañguiñki miñgakauwakí. Akze, namaklde miñkuéñ zhinik na naldagálde shizhiyaga namakldek zhinik nagazháne miñkualdashá.

22 Guatshak ¿mielde shi naldagálde zukuashiñga zukuak atshixa na? Eñki “Saldiñga netshi Jateja ezua zũnekualdal zũñgakaxaldixa guakldeki Duwe Jesúga naldagálde nakldá” guak atshixa. E na ezua sigí Duwe akaldak aguldiñka janañga neshi na, “Jate na, Asukuá Duwe Jesú na, naldagálde nuxa ne nakldá” neka.✠ 23 Mieldejañki “Duwe Jesúki Saldiñga netshi Jatetshi Asukuága naldagálde nakldá” guashi iyapanazhékueki, ake, Ajate jiaga iyapanazháldi na etshi naldazháka. Akze, mieldeke “Duwe Jesúki Jatetshi Asukuága nakldá” guashi ipaná guañkaldekuañki, ake, Ajate jiaga ipani na, etshi

✠ 2:18 2.18 Mt 24.5; 2Ts 2.3-4; 1Jñ 4.3; Aux 13.1-8 ✠ 2:19 2.19 Ajsh 20.30

✠ 2:20 2.20 Jñ 14.26; 16.13; 1Kt 2.12-13; 1Jñ 2.27 ✠ 2:22 2.22 1Jñ 4.3; 2Jñ 7; Jd 4

nek guaňkaldekue.✠

²⁴ Akna kasak Duwek agapa neyabipaneni zhinik e shalda namaklde shi miňkaldiyane nukapanaminamak miñjuizha naldakí, namak za jaňgualga nogatogakue. Ekí mizhekualdaldiakna agajuezha naldakí Jateldi, Asukuá Duweldi jiaga izhoxal minoxaldixa.✠ ²⁵ Ekí izhoxaki Duweja sakí zũňkatshaldixa zũñmene zũňkatshiji na, aldunaxa abisajañ izhoshiňga zũnezhokshataná nakldá.✠

²⁶ Ne, naldagálde shizhixakueki Duwetshi jiúňgul-dak zhinik mimejuldukshindana kakzegakna, be miyaxaldoxaldiamak na ekí miňgakauwatokú. ²⁷ Akze, Jate miyaxazauwaldiamake Duwejaňga Jatetshi Alduna miñgene miňkaldaldiňga miňkaldé. Ejaňga na auxaga shi miňkaldiyal nogatshak, namakldegaba za shi miňkaldixa, ni nauwa naldagálde shi miňkaldiyazhé. Akna jiaq mokue exa zhinik akldé ipa shi miňkaldiyakue miñgajuezhazhaldixa. Ekí nakna Jatetshi Aldunaja shi miňkaldiyanamak Duwek agajuezha naldakí, eldi izhoxal minoxaldí.✠

Jatetshi sukuakuañki jian izhogakue

²⁸ Kaigaki shui sukuakuañ, “Duwe Jesúldi izhoxal minoxaldí” mokue miñmeyaldikue. Ekíki aldéñ naldiňga mokue nagatshak, zũñzek naldakí, ni ji shalda jiwak zũñzukuakí akldabigakualdiamak.✠ ²⁹ Akze, aldéñki jian izhogakuamak za izhuka miñkuahamakga na, ekí miňkualdaka: Mieldeke ekíga jian atshakuamak za katshixake, Jatejaňga aldunaxa abisajañ zũnakukshane, etshi sukuakue nekalde.✠

✠ 2:23 2.23 Jñ 5.23; 8.19; 14.7; 2Jñ 9 ✠ 2:24 2.24 Jñ 14.23 ✠ 2:25 2.25 Jñ 11.25-26; 17.3 ✠ 2:27 2.27 1Kt 2.10-13; 1Jñ 2.20 ✠ 2:28 2.28 1Jñ 4.17 ✠ 2:29 2.29 Ajsh 22.14; 1Jñ 3.7

3

¹ ¡Tu guwíñ! ¡Jate mitsá atemajañ zñnajañguxaga na “nají sukua giemi nibaldá” zññkaldeká katuashá! Akze, asukuákue kaldahamak na kaldá. Naldatshak Duwe Jesú iyapanazhánekuejañki jinak nasññ Jatetshi sukuakue kaldé kagajienazhé naldakí. Saldiñga netshi Jateki “me ne” kaksññze nak.✧ ² Shuikuañ, au Jatetshi sukuakue giemi nek guañkalde. Ne niuwizhíne sakí naldakualdixaki muldetua mu zññgisekuagá nogashá. Naldatshak ekí zññkué: Duwe Jesú mokue nagatshak zñnake, aldéñ sakí ne nahamak naldakualdixa. Jinake naldakí. Atshak aldéñ naldi muldetua agatsahauxabe tuakualdixa nak.✧ ³ Akna mieldeke ekí “Duwe janamé naldaldikue shakldá” zññneshi jiaktuwi kizhukake, aldéñ ni nauwa nusagatse axaldí agatsaldagálde izhogamakbe izhogakualdixa izhgakushi na, aldunaxa janshi ishkazguí, shanek agajué izhogakualdixa.✧ ⁴ Ne, mieldeki sha atshál za izhukaki Jateja jian izhogakue guiyabak guaká atshagábaki, kutám za atshixa. Akze, sha atshákí Jateja guagamak atshagába, ijulduni mual atshá nuxa ne.✧

⁵ Naldatshak ekí miñkué: Duwe Jesúki sha atshá zñnguxal na kagik nakldane.✧ Aldéñki ni nauwa sha atshagálde. ⁶ Akna mieldeke Duweldi izhoxal za nogakualdiake, sha atshalga noxañkaldáaldixa. Ekí ne, mieldeki sha atshalga noxaldiake, eñki Duwe “me ne” ni nauwa aksññzega naldaldixa nakldá.✧

⁷ Shui sukuakuañ, ni meja jalde shalda naldagálde nuxa namak ne mimajañgushazháldi: Mieldeke jian atshakua-mak za atshiji kizhukakuañ guana, Jate zñnatsuñkaki

✧ 3:1 3.1 Jñ 1.12; 15.19,21; 16.3; Ga 4.6-7 ✧ 3:2 3.2 Jñ 17.24; Alm 8.29

✧ 3:3 3.3 2Kt 7.1; 2Pe 3.13-14 ✧ 3:4 3.4 1S 15.22-23; 1Jñ 5.17 ✧ 3:5

3.5 1s 53.5-6,11; Jñ 1.29 ✧ 3:6 3.6 Alm 6.1-2; 1Jñ 2.4; 5.18

Duwe jana janshizhe, jian izhogakuamak kizhuka naldakualdixa. ✧ ⁸ Ne, mieldeki sha atshál izhukaki jisétshiga naldaldixa. Jinake naldakí. Jiséki kasaxa zhinikga ekí sha atshál za izhoshi nagatuka nak. Akze, Jatetshi Asukuá Duwe Jesúki jisé sha zúnatshishixa akiwatiyal guana kagik nakldane. ✧ ⁹ Akna Jateja aldunaxa abisajañ zúnakukshi ají sukuakue zúnaldekshanekuañki sha atshalga nox-añkaldáaldixa. Akze, Jatek zhinikga abisajañ kukáñkalde, ajíkue zúnaldekshiñga zúnaldekshá guane nakna sha atshalga nogazhánazúnaka. ✧ ¹⁰ Ne, mieldeki jian atshakuamak atshál izhogazhéki Jatetshi sukua naldagálde. Ekíga na, mieldeki Duwe ipananekue izhgajañgual nogakí naldaldiake, ake, aiki Jatetshi sukua naldagálde naldaldixa. Ai zhinik na mieldeki namak giemi Jatetshi sukua ne, azhi mieldeki jisétshi nuxa ne tunazúnaka nakldá. ✧

Zhualduxa ajañguakue

¹¹ Akze, ai múldigabaga na kasak Duwe Jesú mipangueni zhinik nukshi naxabinukaki ataba atabañ ajañgual za nogakue zúñgatsé. ✧ ¹² Ne, Kaiñja akaja aguldiyanamak nasúñgaba izhguldiyakue zúñgatsaldakí. Akze, Kaiñki jisé sha atshátshi sáñkaldatshi nalguamakga na, aldani giemi guaxa guanane. Aldéñki shane atshiji izhuka naldatshak, aldani zúnake atshakuamak jian atshiji izhuka nalguakna ekí aldani guaxanane. ✧ ¹³ Akna gajakuañ, Duwe iyapanazhánekuek ekibeñga miyaguldiyatshak, “jínák ekí naxajanká!” jañguabináldi. ✧

✧ 3:7 3.7 Alm 2.13; 1Jñ 2.29 ✧ 3:8 3.8 Gn 3.15; Jñ 8.44; Eb 2.14 ✧ 3:9 3.9 1Jñ 5.18 ✧ 3:10 3.10 Jñ 8.44; 1Jñ 2.29; 4.7 ✧ 3:11 3.11 Jñ 13.34; 1Jñ 4.21; 2Jñ 5 ✧ 3:12 3.12 Gn 4.4-8; Eb 11.4 ✧ 3:13 3.13 Jñ 15.18-19; 17.14

¹⁴ Akze, aldunaldiñki shuañkalde jana nuxa izhoxañkaldogué, Duwe kipanatshake aldunaxa abisajañ zunaldekshane. Sakí zhinik ekí kaldé zũñkualdaka naldakí. Duwek zhinik zhuakaja nekaldekuañgabaki ajañgual kizhogák. Ne mieldeki zũjañguagába izhukaki aldunaldi shuanega naldaldixa. ✧ ¹⁵ Ekíga na, mieldeki Duwe ipananekue aguldiyal nukaki, káguba guaxa atshixá zhuxañga atshixa. Guatshak ekí miñkué: Mieldeki káguba guaxa atshixaki Jateja aldunaxa abisajañ kukshazháne, ni izhoshiñga izhokshazhé. ✧

¹⁶ Akze, Duwe Jesúki zũnajañguiñgaba guñguakna zũnekualdaldiamak, nauwitsaldí shuixaldiamak aldéñgaba aké guane. Ekí zhinik na sakí namak giemi zũjañguakue zũnatuñshá guane. Akna nasũñ jiaga amakbeñga, e ipanáñkalde zhuakaja nekaldekuañgaba ajañguakue zũñgatsé. Ekí aldéñ zũnajañguanamak agat-saldi ajañguiñga na, ekue shaldaki sakí zũñgatsexaldiake, azhi atshuake shuigakue jiaga naldaldiake, “amak ni atshaldikú” itshanakue zũñgatsé. ✧ ¹⁷ Ne, mieldeki izhó guashi jika auxaga axaldé naldatshak, Duwek zhinik akaja nekldé jika agajuezhi guaté tuatshak guañ jañguazháldi agaunegakí naldaldiake, ¿sakí shi Jate zũjañguamakga zũjañguxa naldaka na? ✧ ¹⁸ Akna, shuikuañ, egabá múldigabak za “majañguge nzhakú” negagába, namak giemi aldunaxa zhinik ajañgui, izhgaunexal kuiznoshí. ✧

¹⁹ Ekí izhogakualdiák zhinik na, “Jate namakldetshi naugamakga aldéñki namaklde natuñshanamak izhokuge shakldá” zũñkualdaka. Ekí zhinik na zũñzek náaldaki axaldakldazũnaka. ✧ ²⁰ Azhi atshuake nauwiji aldunajañga

✧ 3:14 3.14 Jñ 5.24; 13.35; 1Jñ 2.9-11 ✧ 3:15 3.15 Mt 5.21-22; 1Jñ 4.20
 ✧ 3:16 3.16 Jñ 3.16; 15.13; Ep 5.2,25; 1Jñ 4.9-11 ✧ 3:17 3.17 Is 58.7; St 2.15-17 ✧ 3:18 3.18 Ez 33.31; 1Pe 1.22 ✧ 3:19 3.19 1Jñ 2.28

“sha atshuge shakldá” zũñmeyatshak jiaga axaldakldazũnakaga. Jinake naldakí. Jatejañki auxaga akué naldi na, aldéñki sakí zũñnegatuka guashiñki zhakaldakga akué kaldák.✠

²¹ Shuikuañ, nauwijí aldunaja zũñgatsé ne zũñmeyakí naldaldiake, zũñzek náaldaki Jate axaldakldazũnaka.✠

²² Amak axaldashi, ji akshishakualdiák amak zũñkatshaldixa. Jinake naldakí. Aldéñ atshakue guagamak axatshál noshi na, akldunamakgaba za axatshañkalduka nak.✠

²³ Akze, atshakue guakákí jalde: Aiki “Jatetshi Asukuá Duwe Jesúki nazikuanamak shakldá” jañguakue. Aiga na, Duweja sakí atshakue zũñmenamakga ataba atabañ ajañgual nogakue.✠

²⁴ Mieldeke Jateja atshakue guagamak axatshál nogakualdiakna, agajuezha naldakí aldéñldi izhogakualdixa, jiak aldéñ zhinik zũñezhgajuekua naldakí nasũñldi izhoxaldixa. Miya zhinik aldéñki amak nasũñldi izhuka zũñkualdaka naldakí. Aiki ají Alduna zũñgenéñ zhinik nakldá.✠

4

Naldagálde shizhixakuek be axaldogakue

¹ Shuikuañ, mieldejañki “Jatetshi Aldunajañga na ekí nazukuakshí” guashi shizhiyatshak, egabá “namak nukshí” jañguagábaki, axáñ misha ekí shizhiyatukaki Jatetshi Aldunajañga ekí guakshatuka, azhi eja ekí guakshakí nuka muldetua tuwi guajakue miñgatsaldaldixa. Jinake ekí miñmeyakí. Matshuwi nekueki naldagálde nuxa “naski Jatetshi múldigaba naldiñga zũñxaitshikuge

✠ 3:20 3.20 Sal 139; 1Kt 4.4; Eb 4.12-13 ✠ 3:21 3.21 1Tm 1.19; Eb 10.22

✠ 3:22 3.22 Jñ 9.31; 15.7; St 5.16; 1Jñ 5.14 ✠ 3:23 3.23 Mt 22.37-40; Jñ

6.29; 13.34; 1Jñ 3.11; 4.21 ✠ 3:24 3.24 Jñ 14.23; 15.10; Alm 8.9; 1Jñ 4.13

nakldá” aldeshi, naldagálde shizhaldiji san san aldeyaté aldogák. ☆ 2 Miya zhinik Jatetshi Aldunajañga aksanegamak guagatuka ne tunazunaka naldakí. Mieldejañki “Duwe Jesú Zunekualkaki kagik nagatshak káguba naldi ixagabaldekldamakga nakldá” guagatuka na Jatetshi Aldunaja aksanegamak ne tunazunaka. ☆ 3 Ne, mieldejañki “Duwe Jesúki káguba naldi ixagabaldegazháne nakldá” guagatukaki Jatetshi Aldunaja aksanegazhé tunazunaka. Eñki ezua sigí Duwe akaldak aguldiñkatshi aldunaja aksaneklde nuxa ekí nexaldixa. Akze, ega na “naxaldixa niyó” nukaminamakga, au kaiga miñgaki anuñka e na agatsekueki naldagálde shizhaldiji san san abizhaldá na akú. ☆

4 Shui sukuakuañ, maiñ zunake Jatetshi nek guamine nakna naldagálde shizhiyatukakuek agubiyamine. Sakí zhinik ekí agubiyamine naldakí. Jatetshi Alduna maiñldiñga miñsaneshi izhukaki, jisé jai kagik Duwe iyapanazhánekuek aksaneká guashiñki zhakaldakga kama axaldé nak. ☆ 5 Akze, naldagálde shizhixakueki Jate “me ne” kaksúñzaldi na, jai kagik zalda shi ishkaldixá nuxa shizhaldixa. Akna Jate aksúñzekuejañki “namak nukshí” ajañgui iyapanka. ☆ 6 Ekí ne, nasuñ Jatetshi nekaldekuañ shi kizhiyatshak, mieldeki Jate “me ne” akuekuejañki zuñkaldukaji zuñkiyapanka. Ne, Jatetshi aldegazhánekueja zunake zuñkaldukazhálde, zuñkiyapanazhé. Ekí zhinik na, mieldeki Jatetshi Alduna namaklde naldiñga neja aksaneshi shizhiyatuka, azhí mieldeki jiséjañga aksaneshi naldagálde nuxa namak jañgushiji shizhiyatuka ne muldetua katunazunaka

☆ 4:1 4.1 Dt 13.1-4; Jer 29.8-9; Mt 24.24; 1Kt 14.29 ☆ 4:2 4.2 1Kt 12.3; 1Jñ

5.1 ☆ 4:3 4.3 2Ts 2.6-7; 1Jñ 2.18 ☆ 4:4 4.4 Jñ 10.29-30; 14.30; Ep 2.2

☆ 4:5 4.5 Jñ 3.31; 15.19

nakldá.✠

Jateki zɯjañguxa nak ajañgual nogakue

⁷ Shuikuañ, ataba atabañ ajañgual za kuiznoshí. Jinate naldakí. Saldiña netshi Jateki zɯjañguá guakue na nahauxa netshi jatega nak. Akna mieldeke zɯjañgual kizhukake, Nauwijatejaña abisajañ zɯnakukshane, aldéñ “me ne” zɯñkué. ⁸ Ekí ne, mieldeki zɯjañgual izhogazhéki Jate “mega nzha” aksúñze. Jinate naldakí. Jateki naldiña zɯjañguxa ne nak.✠

⁹ Akze, Nauwijateki mitsá zɯnajañguxa ne ekí atshatshak guana zɯnatuñshane: Aiki Asukuá ezuamé axaldalgué jiaga jai kagik zɯñgakaxane, ekíki eñkáñ zhinik abisajañ izhoshiña zɯnezhokshaldiamak.✠

¹⁰ Guatshak namaklde zɯjáñguaki ekí ne: Nasuñ Jate jañguáñkalde naldagába, aldéñ zɯnajañguane guana namaklde zɯjañgua nakldá. Ekí zɯnajañgui na, sha katshixa shalda guiyaba tuakue zɯñgatsalgué, zɯnesabiyaldiamak Asukuá shuixal zɯñgakaxá. Ekíki Asukuá akeshi nauwitsaldí shuigatshake sha katshixa zɯñkabetaldiamak.✠

¹¹ Shuikuañ, Jateki ekí agatsaldiña zɯnezhgajañguane nakna, nasuñ jiaga ataba atabañ ajañgual nogakue zɯñgatsé.✠ ¹² Guatshak Saldiña netshi Jatega ni meja, ni mitsák ubak naldi atuazhé. Naldatshak jiaga nasuñki ataba atabañ ajañgual kaldogatshak, jiak aldéñki zɯnezhgajuekua naldakí nasuñldi izhogatshakna aldéñ zɯjañguak guildegakue zɯnajañguaneñka zɯnakldañkashá guane.✠

✠ 4:6 4.6 Jñ 8.47; 10.27; 14.17 ✠ 4:8 4.8 Jer 31.3; Ep 2.4-5; 1Jñ 3.1; 4.16

✠ 4:9 4.9 Jñ 3.16; Alm 8.32; 1Jñ 3.16 ✠ 4:10 4.10 Jñ 15.16; Alm 5.10

✠ 4:11 4.11 Jñ 15.12,13; 1Jñ 3.16 ✠ 4:12 4.12 Jñ 1.18; 1Tm 6.16; 1Jñ 4.20

¹³ ¿Sakí zhinik shi nasuñki Jatek agajuezha naldakí eldi kizhuka naldatshak, jiaq aldéñki nasuñldi izhuka ne zuñkualdaka na? Aiki ají Alduna zuñgenéñ zhinik.☆
¹⁴ Ekíga na, Jateja Asukuáki kágubak katshekuauxa zuñekualdal gaxanamakga ne tuñkaldamak nasuñ aldéñ zuñakaxanekuañki gakuaka.☆ ¹⁵ Akna mieldeke “Duwe Jesúki Jatetshi Asukuá nahamakga nakldá” guashi ipanañkaldeke, Jateki nasuñldi izhuka, jiaq nasuñ zhinik aldéñldi kizhuka zuñkué.☆ ¹⁶ Ekí Jateki mitsá zuñajañguxa zuñwashekldeñ zhinik na, “eñki najañgual nogamakga shakldá” alduna kishixa. Akze, Saldiñga netshi Jateki naldiñga zuñajañguxa nakldá. Akna mieldekuañki aldéñ, ajíkuañ jañgual kizhukake, aldéñldi kizhuka, jiaq aldéñki nasuñldi izhuka zuñkué.☆

¹⁷ Ekí izhogakualdiakna aldéñga zuñajañguak guildegakue zuñajañguaneñka zuñakldañkashá guane naldakualdixa. Ekíga na, jai kagik kizhogeñga akldé akldéñga Asukuá Duwe Jesú janamé izhogakualdixa. Ekígaba izhogakualdiakna, niuwizhíne saldiñgak zuñgatsaldi azhi zuñgatsaldakí ne zuñnatuakué ldiuwañ zegatshak, zuñzek náaldaki axaldagakualdixa.☆ ¹⁸ Akze, zuñajañgua na, zhe mikzexa nañki izhgukuagazhé. Akna mieldeke Jateja zuñajañguak guildegakue zuñajañguaneñka zuñakldañkashá guaneke, zhe mikzexaki zuñsanegaksá guane naldaldixa. Akze, jinake zhe mikzegakue naldakí. Aiki sha atshamalde guiyaba mawatuñshaldixa nak. Akna mieldeki zhe akzeshiñga izhukaki Jateja zuñajañguak guildegakue jañguaneñka akldañkagáldega naldaldixa.☆

¹⁹ Akze, Saldiñga netshi Jate aldéñ misha

☆ 4:13 4.13 Jñ 14.16,20; 1Jñ 3.24 ☆ 4:14 4.14 Jñ 1.14; 3.17; 1Jñ 1.1-2

☆ 4:15 4.15 Jñ 14.23; Alm 10.9; 1Jñ 5.1,5 ☆ 4:16 4.16 1Jñ 3.24 ☆ 4:17

4.17 St 2.13; 1Jñ 2.28 ☆ 4:18 4.18 Alm 8.15

zñezhgajañguanéñ zhinik na zñjañgual izhonazñnaka.✠ 20 Naldatshak mieldeki “naski Jate izhgajañguge nakldá” negatshak Asukuá ipanane aguldiji izhoxaldiake, naldagálde zukuaká nuxa naldaldixa. Akze, akldé jai niuwabak tuñká izhgajañguazháka naldaldiák, ¿saki shi Jate tuazhé míñgaki izhgajañgualdixa na?✠ 21 Ne aldéñga na ekí atsha guakue zññmene: Mieldeke aldéñ za izhgajañgual kalduka nake, Asukuá ipananekue jiaga izhgajañgual nogakue.✠

5

Jatetshi Asukuá za alduna ishakue

1 Mieldeke “Saldiñga netshi Jateja ezua zñnekualdal zññgakaxaldixa guakldaneki Duwe Jesúga nakldá” jañgui ipanañkaldekuañ guana, Jateja abisajañ zñnakukshane, ají sukua giemikuegaba nekalde. Guatshak Nauwijate kizhgajañguxa kaldakna etshi sukua nekldekue jiaga kizhgajañguxa.✠ 2 Akze, Nauwijate namak giemi izhgajañgui, aldéñ atshakue guagamak atshiji kizhogéñ zhinik na, etshi sukua nekldekue jiaga kizhgajañguxa zññkualdaka. 3 Akze, Saldiñga netshi Jate izhgajañguaki ekí ne: Aldéñ atshakue guagamak za atshá. Ai atsha guakue guakaki atsháasa jiba neki naldazhé.✠ 4 Jinake naldakí. Mieldeke Jatejañga abisajañ zñnakukshanekuañki jai kagik zalda za jañguxakue ajanashamak atshakue zññgasanegatshak jiaga, amak atshañkaldáaldixa nak. Miya zhinik ekí sha atshák agubiyazanazñnaka naldakí. Duwe Jesú alduna kishéñ zhinik.✠ 5 Akze, ¿mieldek shi kagik sha atshák

✠ 4:19 4.19 1Jñ 4.10 ✠ 4:20 4.20 1Jñ 2.9; 3.17; 4.12 ✠ 4:21 4.21 Mt 22.37-40; Jñ 13.34; 14.15; 1Jñ 3.23 ✠ 5:1 5.1 Jñ 1.12-13; 1Jñ 4.15 ✠ 5:3 5.3 Jñ 14.15; 1Jñ 4.21; 2Jñ 6 ✠ 5:4 5.4 Jñ 16.33; Ep 6.16; 1Jñ 3.9; 4.4

agubiyakualdixa na? Ezuañgaba “Duwe Jesúki Jatetshi Asukuága shakldá” jañgui alduna ishiji kizhukakuañ.✠

Duweki “me ne” zñnatuñshixakue

⁶ Akze, Duwe Jesúki zñnekualdal kagik nagueni ají jiba atshapanatshak nik ajaukshá.✠ Ai za atshazhá, zñnekualdaldiamak abi akzuldi shuizhá.✠ Jatetshi Aldunaja guana ekí atshane shalda zñnatuñshi, “me ne” zññwashekual za nuka. Jinake naldakí. Aldéñki naldiña nahamakga, namaklde ne zñnatuñshixa nak.✠ ⁷ Akze, Duwe namaklde ne zñnatuñshatukakueki maigua nekue. [Jékaldaxa izhukakueki Nauwijate, Duwe Jesúga Jatetshi Múldigaba, Jatetshi Alduna. Maigua aldaldatshak ezuameña nekue.✠ ⁸ Naldatshak jiaq jai kagik jiaga maigua naña.] Aikuega na, ezua agatsalda neki Jatetshi Alduna aldénga zññgene. Mozhua agatsalda neki Duwe Jesú nik ajaukshane. Maigua agatsalda neki Duwe Jesú zñnekualdaldiamak abi akzuldi shuane. Ai maigua aldaldatshak zhualduxa izhgakualdi aldoshi na, Duwe “me ne” shalda zñnatuñshatukakue.

⁹ Guatshak nasuñ kágubake ezujaja tunamak ne zññmeyaldiake, “namak ni guak” jañgui kagipanka. Kágubakgaba jiaga ekí kishkatshixa nake, Saldiña netshi Jateja Asukuá shaldaga akuahamak zññmeñká✠ míñgaki akaldak akzé nak agipanakue naldashá. ¹⁰ Mieldeke Duwe Jesú Jatetshi Asukuá namak jañgui ipañañkaldeke, nauwijí aldunaldi “Jateja guakáki namak sha guak” jañgui, aik za kama gúxañkalde kalduka. Ekí ne, mieldejañki Jateja guaká agipanakí naldaldiake, naldagálde zukuaká

✠ 5:5 5.5 1Jñ 4.15 ✠ 5:6 5.6 Mt 3.13-17; Ex 29.1-21 ✠ 5:6 5.6 Is 53;

Jñ 19.33-37 ✠ 5:6 5.6 Jñ 14.26; 15.26; 1Kt 2.9-16; 1Jñ 2.27 ✠ 5:7 5.7

Dt 19.15; Jñ 1.1; 10.30; Aux 19.13 ✠ 5:9 5.9 Mt 3.16-17; 17.5; Jñ 5.36-40;

8.14-18

janañga axazgualdixa. Jinake naldakí. Jatejañga Asukuá shalda akuahamak ne akbeyatshak jiaga, namak jañguagálde nak.✠

¹¹ Akze, Jateja jalde guana akuahamak ne zuñmeñka: Asukuá zunekuane namak jañgui ipanañkaldekuañ za na abisajañ izhoshiñga zunezhokshapanane.✠ ¹² Akna mieldeke Asukuá ipanañkaldekuañki abisajañ izhoshiñga kizhuka. Ekí ne, mieldejañki Asukuá ipanakí naldaldiák, e na izhoshiñga izhogazháka naldaldixa nzha.✠

Aldiwe kakbene

¹³ Maiñ “Duwe Jesúki Jatetshi Asukuága nazikuanamak nakldá” jañgui ipanaminekuañ na jalde kalta ekí miñgakauwatokuge. Ekíki abisajañ izhoshiñga izhogapanamine muldetua miñkualdiñga mizhekualdaldiamak. [Ekíga na, abá naldakí “Jatetshi Asukuá Duwe Jesú nazikuanamak shakldá” alduna ishalga minoxaldiamak.]✠

¹⁴ Ekí zuñkualdi na, zuñzek naldakí Jatek axaldakldazunaka. Akze, aldéñ ji akshishakue zunajañguamak akshishakualdiake, “naldukaldixa shakldá” zuñkué.✠ ¹⁵ Ji akshisháñkalde zunaldukaldixa zuñkualdi na, ekí jiaga zuñkué: Ji akshisháñkaldeki amak zuñkatshá guanega naldaldixa.✠

¹⁶ Akna mitsake ezuak Duwe ipanaminekuañga sha atshiji, ijuldunaté mitualdiake, e shalda Jatek akshishakue. Ekí akshishaminamak Jatek agakualdinatshake, ek agajué abá guagába, aldéñ nañga muldetua izhokshaldixa. Ai jiaga, Jatek agakualdinakakga sha atshane naldaldiák za na ekí Jatek akshishakue. Ne, ezua sha atshá Jatek

✠ 5:10 5.10 Jñ 3.33; Alm 8.16; 1Jñ 1.10 ✠ 5:11 5.11 Jñ 1.4; 1Jñ 2.25; 4.9

✠ 5:12 5.12 Jñ 3.15-16,36; 5.24 ✠ 5:13 5.13 Jñ 20.31; 1Jñ 1.1-2 ✠ 5:14

5.14 Ep 3.12; 1Jñ 3.22 ✠ 5:15 5.15 Is 65.24

agajué za izhoshiñga mezhokshakue atshaté mutualdiake, ai shaldaga Jatek akshishakueki miñmeyakí.✠ 17 Akze, saldiñga kutám ne atshá guakueki Jatek sha axatshiji nuxa ne. Naldatshak sha atshá agakualdi guakueki amak magakualdinaldiake Jatek agajué za izhoshiñga nogakueñka mauldeyasé.✠

18 Ekí zuñkualdaka: Jateja abisajañ zuñakukshanekuañki sha atshál izhoxañkaldáaldixa. Akze, Jatetshi Asukuága numañ zuñnatuwi izhogakna, sha atshátshi sáñkaldá jiséki sha zuñakuá akzegazháldixa.✠

19 Ekí jiaga zuñkué: Nasuñ Duwe Jesú ipañañkaldekuañki Jatetshi sukuakue nekalde. Ne saldiñga e iyapanazhánekueki jisé jai kagik sanegatukaja za kaksaneka.✠ 20 Ekí jiaga zuñkué: Duwe Jesú Jatetshi Asukuá giemiga zuñkaldaklde. Jinak zuñkaldaklde naldakí. Saldiñga netshi Jate nahamakga ne “me ne” muldetua zuñgajieñguanéñ zhinik na, Jate na ishkalbaldexal izhogakualdixa nak. Jate namakldeldi ekí kizhogamakga na, Asukuá Duwe Jesúldi kizhuka. Duwega na Jate namaklde, abisajañ izhoshiñga mezhokshakue nakldá.✠

21 Shui sukuakuañ, Jatek mimagajuekuaka jigabá akldé agazukuxak agajué za noshi, be minoxaldí.✠

Ekíga shi naldí.

✠ 5:16 5.16 Job 42.8-9; Mt 12.31-32; Jñ 17.9; Eb 10.26-27 ✠ 5:17 5.17 1Jñ 1.9; 3.4 ✠ 5:18 5.18 Jñ 10.27-29; Alm 8.38-39; 1Jñ 3.9 ✠ 5:19 5.19 Jñ 12.31; 14.30; Ep 2.2 ✠ 5:20 5.20 Jñ 1.14,18; 17.3; 1Jñ 5.10-12 ✠ 5:21 5.21 1Kt 10.14

Jatetshi múldigaba

Kogi: Jatetshi múldigaba New Testament

Copyright © 2015 Wycliffe Bible Translators, Inc.

Language: (Kogi)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 11 Feb 2021 from source files dated 10 Feb 2021

7c5b6db6-c9a4-56c8-a822-4345cd7bafc0